

l'aller ou fecourir viuant, ou querir mort, Mais eftans arriuez au lieu qu'on auoit defigné, & apres auoir parcouru quasi toute la cofte avec bien du trauail fans rien trouuer, Dieu y ayant pourueu d'ailleurs, ils ne le virent qu'à leur retour.

Or pour comble de benediction le iour de la Touffaincts comme nous eftions fur le poinct de dire Vefpres, nos Peres de la Miffion de la Conception arriuerent icy, & nous apporterent ce dont nous auions perdu quasi toute efpérance, les Reliques des Saincts que ce traiftre barbare auoit enleué au pauvre malade. Ce malheureux volleur n'ayant pas trouué dans le paquet ce qu'il penfoit y estre, & n'y ayât quasi rië veu que des chofes dont il n'eufft pû tirer aucun vfage, se refolut par ie ne fçay quel mouuement fecret de cacher ledit paquet dans les bois, & pourfuiure fa route: de forte qu'au retour de fon voyage qui dura 40. ou 50. iours, ayant appris que Robert le Coq estoit encore en vie, se doutant bien que fon vol feroit [29] cogneu, il reprit & rapporta ledit paquet, & n'eut pas affez de front pour le nier à nos Peres, qui s'adrefferent à luy auffi toft qu'il fut arriué. Sans doute ces bons Saincts à qui fouuent nous recommandions affectueufement cette affaire qui les touchoit eux-mefmes autât que nous, auoient écouté nos prieres. Ils n'euffent pas pû nous donner cette ioye en vne meilleure iournée: nous expofafmes incontinent fur noftre Autel toutes ces belles & heurufes Reliques, avec bon nombre d'autres qui nous estoient venuës de France cette année. Les Vefpres de ce fainct iour furent chantées avec vne confolation qu'il feroit difficile d'expliquer.

Mais reuenons à nos Sauuages animez contre nous